

Vuk'uzenzele

O e tlisetwa ke Dikgokahano tsa Mmuso (GCIS)

English\Sesotho

Phuptjane 2022 Kgatiso 1

Baoki ba pele ba diphoofole ba Afrika Borwa ba fumana mangolo a thuto

Allison Cooper

Ho ba dirutehi tsa ho qala ho ba baoki ba diphoofole ke toro e phethahetseng bakeng sa modudi wa Randburg Phumelela Mthimkhulu (21), eo esale a na le lerato la diphoofole ho tloha bo-nngwaneng.

Mthimkhulu haufinyana tjena o fumane mangolo a thuto Yunivesithing ya Pretoria (UP), e leng sona feela setheo sa thupello ya bongaka ba diphoofole Afrika Borwa, ka lengolo la kgerata ya *Bachelor of Veterinary Nursing*.

“Ke ntse ke sa kgolwe hore ke nna enwa. Ho tseba hore ke ne ke le karolo ya sehlopha sa pele sa ho etsa lengolo lena, e leng se nku-kileng dilemo, ke tlotla.

“Ke lebohela menyetla le mamati a tla buleha bakeng sa rona baoki hore re ntshe-tse dithuto tsa rona pele le ho ipabola ka hara lekala la rona, e leng se neng se le boima ho se etsa nakong e fetileng,” o rialo.

Tamarin Fisher, e leng

Moporesidente wa Mokgatlo wa Baoki ba Diphoofole wa Afrika Borwa, o re ona ke mokolokotwane o moholo ka ho fetisisa nalaneng ya dilemo tse 42 lekaleng lena.

“Lengolo lena le letjha la dilemo tse tharo le tla neha baoki ba nang le mangolo monyetla wa ho ingodi-

setsa dithuto tsa kamora dikgerata, moo re tshe-pang hore ba tla qetella ba fumane mangolo a *honours*, *masters* le a bongaka (*PhD*).”

Baalafi ba diphoofole ba alafa maqeba a diphoofole le mahloko, ho tshwana feela jwaloka ha ngaka e fana ka kalafo ya bophelo bo botle bathong.

Baoki ba diphoofole ba bohlokwa dihlopheng tsa seporofeshenale tsa dingaka tsa diphoofole, ho rialo Mthimkhulu.

“A mang a maitsebelo a bohlokwa ao mooki a lokelang ho a bontsha ke tlhokomelo ya bakudi, ho buisana le ditelaente, ho thusa dingaka tsa diphoofole ka ditsamaiso, le ntho e nngwe le e nngwe e tla thusa sepetlele sa diphoofole ho sebetse ka tsela e hlwahlwa ka ho fetisisa.

“Ke le leng la makala a putsang ka ho fetisisa.

Haeba o batla ho ba mooki wa diphoofole, o se ke wa dumella tshabo kapa kgaello ya tsebo ho o thibela ho le leka le ho le thabela hobane le tla fetola bophelo ba hao hore e be bo betere,” ho rialo Mthimkhulu.

Dibasari bakeng sa ho tobana le kgaello ya maitsebelo

Ka lebaka la kgaello e kgolo ya maitsebelo lekaleng lena, Mthi-


mkhulu ha a ka a sokola ho fumana mosebetsi.

“Ke bile lehlohonolo haholo hore ke fumane mosebetsi Sepetlele sa Diphoofole sa Fourways selemong sa ka sa ho qetela.

Ke qadile ho sebetse moo ntho e ka etsang kgwedi kamora ditlhahlobo tsa makgaolakgang mme esale ke thabela motsotso o mong le o mong,” o rialo.

Bolaodi ba Lekala la Thuto le Thupello la Kalafo le Thekolohelo (HWSETA) le itlametse ho tobana le kgaello ya maitsebelo e fetelletseng ka hara lekala la kalafo ya diphoofole le ho netefatsa diphepho.

Haufinyana tjena bo thakgotse Letsholo la Tataiso ya Lekala la Saense ya Kalafo ya Diphoofole, ka semphato le Lefapha la Thuto le Thupello e Phahameng, mme bo tla etela dikolo tsa metseng ya mahae ho kgothaletsa baithuti ho nahana ka





Phumelela Mthimkhulu ke e mong wa dirutehi tsa pele tsa ho ba mooki wa diphoofole ka hara naha.

E tswella pele leqepheng la 2



Lata karete ya hao ya laesense ya ho kganna

Leqephe 2



Ho aha maphelo botjha le boiphedisso kamora dikgohola

Leqephe 3



Ho bala Vuk'uzenzele fumana epe ya GOVAPP ho:



Batla SA Government ho Google playstore kapa ho appstore

IKOPANYE LE RONA HO

f Vuk'uzenzele

@VukuzenzeleNews

Diwebosaete: www.gcis.gov.za Imeile: vukuzenzele@gcis.gov.za
www.vukuzenzele.gov.za Mohala: (+27) 12 473 0103

Tshedimosetso House:

1035 cnr Frances Baard and Festival streets, Hatfield, Pretoria, 0083

VUK'UZENZELE KE MAHALA, HA E REKISWE

E tswella pele ho tswa ho leqephe la 1

ditshebeletso tsa kalafo ya diphoofolo jwaloka motjha wa mosebetsi.

Bo boetse bo tsebisitse dibasari tse 60 bakeng sa ho tobana le kgaello e hlokolosi ya dingaka tsa diphoofolo le bathusi ba dingaka tsa diphoofolo dibakeng tsa mahae tsa Afrika Borwa.

“Dibasari di reretswe ka ho toba baithuti ba dibakeng tsa metse ya mahae kaha ba ka busetsa tsebo ya bona metseng ya bo bona,” ho rialo Ngaka Nomfundo Mnisi, e leng Modulasetulo wa HWSETA.

Motlatsi wa Letona la Thuto e Phahameng, Saense le Ntjhafatso, Buti Manamela, o amohetse dibasari tsena.

Lefapha la UP la Saense ya Bongaka ba Diphoofolo le tla thusa HWSETA ka matsholo a ho ibapatsa, a

matlole a dibasari le a ho thaotha.

**“Ke lebohela
menyetla le
mamati a tla
buleha bakeng sa
rona baoki hore re
ntshetse dithuto
tsa rona pele le ho
ipabola ka hara
lekala la rona, e
leng se neng se le
boima ho se etsa
nakong e fetileng.”**

“Re tla boela re thuse HWSETA mabapi le ho tsamaisa dibasari, tse neng di abetswe baithuti ba selemo sa pele sa saense ya kalafo ya diphoofolo ho tswa dihlopheng tse hloakang menyetla,” ho rialo Chris van Blerk, Hlooho ya Dikgokahanyo le Merero ya Boraditaba Lefapheng la Saense ya Kalafo ya Diphoofolo la UP.

O re batjha ba lakatsang

ho latela menyabuketsong ya Mthimkhulu le ho ingodisa bakeng sa le-ngolo la pele la dikgerata UP ba lokela hore ba be ba phethetse Setifikeiti se Phahameng sa Naha (NSC), kapa lengolo le tshwanang le lona, le ho kgema le ditlhoheho tsa mantlha.

“Bakeng sa kgerata ya Booki ba Diphoofolo, ba lokela ho kgema le Seahloho sa Dintlha tsa Kamohelo sa 28 le NSC ka Senyesemane e le Puo ya Lapeng kapa Senyesemane e le Puo ya Pele ya Tlatsetso, mmetse, le saense kapa disaense tsa bophelo,” o a tlatseletsa.

Bakeng sa tlhahiso-leseding e eketsehileng ka lekala lena, batjha ba ka iteanya le dibaka tsa bongaka ba diphoofolo kapa ba ka bua le baalafi ba diphoofolo ba tsebeletso e tlamang ya badudi (CCS) bao e leng karolo ya Lefapha la Temothuo,

Tlhabollo ya Mobu le Ntshetsopele ya Dibaka tsa Mahae (DALRRD) ho phatlalla le naha.

“Lenaneo la CCS le rerile ho fana ka ditshebeletso tse fihlillehang le tse kgonehang tsa bongaka ba diphoofolo dibakeng tse

sa fumaneng ditshebeletso tse batlehang le ho haella ka mehlodi ka hara Afrika Borwa. Kahoo, dingaka tsa diphoofolo tsa lenaneo di tla dula di sebetse jwaloka mehlodi e hlwahlwa ya tlhahisoleseding,” ho rialo Van Blerk.

Mokgwa wa ho etsa kopo

Ho etsa kopo bakeng sa e nngwe ya dibasari tse ntjha, baithuti ba ikemiseditseng ba lokela ho etsa kopo feela bakeng sa Lengolo la Saense ya Kalafo ya Diphoofolo kapa la Booki ba Diphoofolo (ba tla ikgethela ho dithuto ka bobedi) ka ho kena we-psaeteng ya UP ho www.up.ac.za/online-application. Baithuti ha ba a lokela ho etsa dikopo ka kotloloho ho HWSETA.

Letsatsi la ho qetela la dikopo ke la 30 Phuptjane. Ha o batla ho tseba haholwanyane ka makala a saense ya kalafo ya diphoofolo ka hara UP, etela www.up.ac.za/faculty-of-veterinary-science.

Ha o batla ho tseba haholwanyane ka dibasari tse ding tse teng lekaleng lena, etela www.up.ac.za/faculty-of-veterinary-science/article/33926/bursaries-for-veterinary-science-studies.

Lata karete ya hao ya laesense ya ho kganna

Bakganni ba entse-
ng dikopo tsa
dilaesense tsa ho
kganna kapa ho ntjhafatso
dikarete kapa diphomete
tsa seporofeshenale tsa
ho kganna (PrDP) pakeng
tsa Mphalane le Tshitwe
ngwahola ba kgothaletswa
ho ya di lata.

Ho ya ka Koporasi ya Bolaodi ba Sephethephe-the Mebileng (RTMC), ke feela 42% ya dikarete tsa dilaesense tsa ho kganna tse 32 748 tse hlalisitsweng nakong ena tse latuweng.

Letona la Dipalangwang Fikile Mbalula le butse ditsi tsa phano ya dilaesense tsa RTMC Midrand le Eco Park ngwahola, e le karabelo ya tshallomorao ya dilaesense tsa ho kganna tse felletswe-
ng ke nako ka lebaka la COVID-19.

Akhaonte ya Dikarete tsa

Dilaesense tsa ho Kganna, e hatisang dilaesense, e sebetse bosiu le motsheare ho akofisa tlhahiso mme e ntse e le motjheng wa ho fedisa tshallomorao mafelong a Phuptjane.

RTMC e re batho ba lokela ho lekola boemo ba dikopo tsa bona pele ba leba ditsing tsa diteko ba ilo di lata.

Sena se ka etswa ka SMS kapa ka inthanete.

Ho lekola ka SMS boemo ba dikopo tsa bona tsa dilaesense tsa ho kganna

Bakeng sa bothata ba dilaesense tsa ho kganna, baikopedi ba ka romela dinomoro tsa bona tsa ID ka SMS ho 33214. Ebe ba tla fumana e nngwe ya di-SMS tse ka tlase mona:



- *Application received: The application was received, but has not yet been processed.*
- *Production queue: The card is still being processed and manufactured.*
- *Produced and ready for collection: The card will be ready for collection in 21 days. However, due to the high number of cards being processed, the RTMC advises you to wait 35 days before going to collect.*
- *Problem card: There is a*

problem with the production of your card. Please return to the testing centre.

Ho lekola boemo ba kopo ya hao ya PrDP, romela nomoro ya ID ka SMS ho 44220.

Ho lekola ka inthanete boemo ba dikopo tsa bona tsa dilaesense tsa ho kganna

O ka boela wa tseba boemo ba kopo ya hao mahala ka

inthanete.

- Etela online.natis.gov.za.
- Iketsetse porofaele mme o kene websaeteng.
- Tobetsa boemo ba kopo ya hao websaeteng.

Bao dilaesense tsa bona di felletswe-
ng ke nako pakeng tsa Tlhakubele 2020 le 31 Phato 2021, ba tlotsweng ke letsatsi la ho qetela la ho ntjhafatso la 5 Motshe-anong, ba eletswa ho iphumanela laesense ya ho kganna ya nakwana ha ba etsa kopo ya ho ntjhafatso bakeng sa ho dula ba ntse ba imatahantse le molao.

Leha ditsi tsa RTMC di butswa Mantaha ho isa Sontaha ho tloha ka hora ya bosupa hoseng ho fihlela ka hora ya borobong bosiu, setjhaba se kgothaletswa ho nka monyetla wa mela e mekgutshwane ka bo-Labohlano le mafelong a beke.

Tlhahisoleseding e fanwe ke RTMC.



**government
communications**

Department:
Government Communication and Information System
REPUBLIC OF SOUTH AFRICA

Tel: 012 473 0353

Email: vukuzenzele@gcis.gov.za

Address: Private Bag X745, Pretoria, 0001

**Head of Editorial and
Production**
Regomoditswe Mavimbela
Regomoditswe@gcis.gov.za

Acting Editor-in-Chief
Zanele Mngadi | Zanelemngadi@gcis.gov.za

Acting Managing Editor
Tendai Gonese | tendai@gcis.gov.za

News Editor
Noluthando Motswai

Writer: More Matshediso

Graphic Designers
Tendai Gonese | Benny Kubjana

Production Assistants
Jauhara Khan | Sebastian Palmer

Language Practitioners
Nomgcibelo Motha | Boitumelo Phalatshe
Thandolunye Magudulela | Sizwe Ziqubu

All rights reserved. Reproduction of the newspaper in whole or in part without written permission is strictly prohibited.

Vuk'uzenzele
is published by Government
Communications (GCIS)



Printed by:



Distributed by:





Ho aha maphelo botjha le boiphediso kamora dikgohola

Ese e ka ba dikgwedi tse pedi dikgohola tse matla di bakile mahlomola ho parola le dikarolo tsa KwaZulu-Natal, Kapa Botjhabela le Leboya Bophirima, le ho baka tahlehelo e kgolohadi ya bophelo le tshenyo ya thepa le infrastraktjha.

Haufinyana tjena ke ne ke etetse Thekong ho la KwaZulu-Natal ho kopana le beng ba dikgwebo motsemoholo bakeng sa ho fana ka tshehetso bakeng sa maiteko a bona a ho tsoseletsa botjha ditshebetso tsa bona.

Ha koduwa ena ya tlhaho e ne e hlasela, ho bile le ngongoreho ya hore ba ka maemong a hodimo ba hloka bokgoni kapa maikemisetso a ho arabela ka nepo le ka bokgabane boemong bona bo nyarosang ba batho ba lahlehetsweng ke tsohle.

Kamora leeto la ka la bobedi motsemoholo esale kamora dikgohola, ke hlaketswe hore ngongoreho ena e ne e se yona. KwaZulu-Natal, jwaloka Kapa Botjhabela le Leboya Bophirima, bankakarolo bohle esale ba semelletse bakeng sa ho hlaphohelwa diketsahalang tsena tse bohloko.

Setsi sa Naha sa Bolaodi ba Dikoduwa esale se hokahanya mafapha ohle a mmuso maitekong a bona a ho fana ka kimollo malapeng a mangata a neng a anngwe ke taba ena. Ho ne ho thabisa ho bona mekgatlo eo e



seng ya mmuso, badudi, dikgwebo le mekgatlo ya kimollo e kenella bakeng sa ho sebetse le mmuso mabapi le ho fana ka thuso ya kimollo e batlehang haholo.

Bankakarolo bana kaofela ba fanne ka dijo, diaparo, dikobo, dipakana tse busetsang seriti le diaparo tsa sekolo malapeng a tsietsing bakeng sa ho kgotsofatsa ditlhoko tsa bona tsa mantlha.

Ditshebetso tsa bodulo hajwale di a nehelanwa bathong ba fetang 7 000 diterekeng tse nne tse amehileng ka ho fetisisa KwaZulu-Natal. Mosebetsi wa ho aha dibaka tsa

bodulo tsa nakwana o se o qadile bakeng sa malapa a amehileng mobung wa puso mme ho na le ditsha tsa mobu tse hlwauweng KwaZulu-Natal bakeng sa hore ba ka fallisetswa moo.

Lefapha la Merero ya Lehae, la Bophelo bo Botle le la Ntshetsopele ya Setjhaba a ne a ntse a thusa metse e amehileng ho fihlella ditshebetso tsa bohlokwa. Ho tea ka mohlala, diyuniti tsa hloma-o-hlomolle di thusa ba lahlehetsweng ke ditokomane tsa bohlokwa dikgoholeng bakeng sa ho fumana di-smart ID tse ntjha le ho ntshuwa botjha

ha mangolo a tlhaho.

Ditshebetso tsa kalafo tsa hloma-o-hlomolle, ho kenyeletswa dientse tsa COVID-19, di a nehelanwa bathong ba dibakeng tseo ditsha tse tshwarehang di so kang di sebetse ka botlalo. Ditsela tsa ho lefa dithuso tsa ditjhelete tsa mmuso di teng bakeng sa ba amehileng.

Diphaposi tsa borutelo tsa hloma-o-hlomolle di a rekwa bakeng sa hore ho ithuta le ho ruta di seke tsa sitiseha ho feta dikolong tse anngweng ke dikgohola.

Mosebetsi o motjheng bakeng sa ho lokisa dibaka tsa tlhwekiso ya metsi, diteishene tse pompang metsi le marangrang a tsamaiso ya metsi. Ditsela tse senyehileng di a lokiswa.

Marokgo a matjha a 18 a rerilwe e le karolo ya lenaneo la Marokgo a Dibaka tsa Mahae la Welisizwe.

Ho boetse ho bile le kgatelopele e matla bakeng sa ho lokisa infrastraktjha e ka sehloohong e tshehetsang Boemakepe ba Durban. Ka lebaka la bohlokwa ba boemakepe moruong wa naha le wa kontinente, sephethephe the sa boemakepeng se buseditse madulong, ditshebetso tsa theminale di kgutlile ka botlalo le mosebetsi wa ho lokisa infrastraktjha ya diporo tse senyehileng o motjheng.

Mehato ya tlatsetso e kentswe bakeng sa ho fana ka tshehetso ya

ditjhelete ho ka bobedi dikgwebo tse nyane le tse kgolo tse mathateng. Sena se a hlokeha kaha e le taba e potlakileng bakeng sa ho netefatsa hore dikgwebo di a phela le mesebetsi e a baballwa.

Ka dinako tse fapaneng nalaneng ya demokerasi ya rona, esale re tobana le diketsahalo le maemo a behileng boitseko ba batho ba bo rona le bokga bane ba ditheo tsa rona ditekong tse matla.

Re bone bonngwe bo sa tlwaelehang le tshehetso metseng e amehileng KwaZulu-Natal, Kapa Botjhabela le Leboya Bophirima. Mebuso ya bomasepala le ya diprovense esale e sebetse mmoho le mafapha a naha le makala a mang bakeng sa ho thusa batho ho aha botjha maphelo a bona le ho etsa hore mesebetsi ya moruo ya lehae e boela motjheng.

Esale ba sebetse le bankakarolo bohle dibakeng tsena kaofela ho netefatsa hore re hokahanya ka bokgabane maiteko a ho hlaphohelwa le hore re etsa meralo le ho aha botjha ka tsela ya boitseko mabapi le diketsahalo tse mahlonoko tse tshwanang le tsena kamoso.

Mamello ya badudi ba amehileng, maikemisetso a bona a ho atleha le bokgoni ba bona ba ho ipopa mmoho dinakong tsa tlokotsi e bile kgothatso.

Re hlomphe bohle bao e bileng karolo ya boiteko ba ho thusa batho ba diprovense tse amehileng.

Re le mmuso, re sebedisa mehlodi kaofela e teng le ho etsa boiteko bohle ba ho netefatsa hore, ha re aha botjha, ha ho ya salleng morao.